

Na osnovu čl. 4.1, 4.2, 5.3 i 9.7 Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i zahtjeva Nezavisnog operatora sistema u Bosni i Hercegovini, broj: 3492-1/14 od 16. decembra 2014. godine, na sjednici Državne regulatorne komisije za električnu energiju, održanoj 30. decembra 2014. godine, donijeta je

ODLUKA

O TESTNOM PERIODU PRIMJENE PROVEDBENIH PRAVILA I PROCEDURA PRUŽANJA POMOĆNIH USLUGA I BALANSIRANJA ELEKTROENERGETSKOG SISTEMA BOSNE I HERCEGOVINE

I

Testni period iz člana 15. stav (1) Odluke o privremenom uređenju načina obezbjeđenja i pružanja pomoćnih usluga i balansiranja elektroenergetskog sistema Bosne i Hercegovine ("Službeni glasnik BiH", broj 92/14) traje najduže do 31. maja 2015. godine.

II

Do navedenog roka Nezavisni operator sistema u Bosni i Hercegovini (NOS BiH) će ispuniti sve preduvjete za efektivnu primjenu Odluke o privremenom uređenju, uključujući objavu provedbenih pravila i procedura, stavljanje u punu funkciju Sistema za daljinsko očitavanje brojila (AMR sistem), nabavku potrebnih programskih alata i obuku osoblja.

III

Prije početka efektivne primjene, NOS BiH će realizirati nabavke potrebnih kapaciteta sekundarne i tercijarne rezerve, a DERK će odrediti tarife za sistemske usluge i ostale numeričke vrijednosti predviđene Metodologijom za izradu tarifa za usluge prijenosa električne energije, nezavisnog operatora sistema i pomoćne usluge – Prečišćeni tekst ("Službeni glasnik BiH", br. 93/11 i 61/14).

IV

NOS BiH i tržišni učesnici će provjeravati sva rješenja iz provedbenih pravila i procedura pružanja pomoćnih usluga i balansiranja elektroenergetskog sistema BiH. NOS BiH će promptno otklanjati uočene nedostatke u pružanju pomoćnih usluga i balansiranja elektroenergetskog sistema BiH.

V

U toku trajanja testnog perioda NOS BiH će dostavljati DERK-u redovne mjesečne izvještaje o primjeni Odluke o privremenom uređenju.

VI

Ova odluka stupa na snagu danom donošenja, a objavit će se u "Službenom glasniku BiH".

Broj: 04-28-7-369-8/14
30. decembra 2014. godine
Tuzla

Predsjedavajući Komisije
Nikola Pejić

Obrazloženje

Državna regulatorna komisija za električnu energiju je 26. marta 2014. godine donijela *Odluku o utvrđivanju Koncepta pomoćnih usluga za balansiranje elektroenergetskog sistema Bosne i Hercegovine* (u daljnjem tekstu: Koncept).

Istovremeno je donijet *Zaključak o usvajanju Plana aktivnosti na realizaciji Koncepta i Zaključak o pokretanju aktivnosti na donošenju novih Tržišnih pravila* i pripremi dodatnih procedura i pravila potrebnih za njihovu implementaciju, kako bi efektivna primjena rješenja iz Koncepta započela 1. januara 2015. godine.

U vremenu koje je slijedilo nakon donošenja pomenutog seta dokumenata, ozbiljno je narušena dinamika provođenja planiranih aktivnosti. Mada su izmjene *Metodologije za izradu tarifa za usluge prijenosa, NOS-a i pomoćne usluge*, pravovremeno izvršene (16. jula 2014. godine), značajno usporavanje dinamike, pa i potpuni zastoje u drugim aktivnostima, doveo je do nemogućnosti realizacije kasnijih faza, kao što je pravovremeno provođenje testnog perioda, nabavka kapaciteta sekundarne i tercijarne rezerve, donošenje odluke o tarifama za sistemske usluge itd.

DERK je, u cilju prevladavanja postojećeg stanja i potpunog zastoja u implementaciji Plana aktivnosti, 18. novembra 2014. godine donio *Odluku o privremenom uređenju načina obezbjeđenja i pružanja pomoćnih usluga i balansiranja elektroenergetskog sistema BiH*. Tom odlukom predviđeno je da se prije početka njene efektivne primjene testiraju provedbena pravila i procedure do 31. decembra 2014. godine, uz mogućnost produženja na zahtjev NOS-a.

NOS BiH je svojim zahtjevom od 16. decembra 2014. godine procijenio da se 1. juni 2015. godine može prihvatiti kao orijentacijski rok za početak efektivne primjene Odluke. Prihvatajući zahtjev NOS-a BiH za produženje testnog perioda, DERK donosi *Odluku o testnom periodu primjene provedbenih pravila i procedura pružanja pomoćnih usluga i balansiranja elektroenergetskog sistema BiH*.